

Perlu hukuman khidmat sosial terhadap individu bangkitkan sentimen perkauman

Noor Hidayah Tanzizi

November 27, 2022 @ 2:39pm

Kuala Lumpur: Individu yang membangkitkan sentimen perkauman sehingga menjejaskan perpaduan dan keharmonian negara bukan hanya perlu dikenakan tindakan tegas, malah mereka juga perlu melalui 'hukuman' khidmat sosial untuk membina rasa hormat serta tolerasi.

Pengerusi Yayasan Keprihatinan Komuniti Malaysia (MCCF) Datuk Seri Halim Ishak berkata, sentimen perkauman perlu ditangani dengan lebih cekap supaya ia tidak terus menjadi 'barah' dalam negara yang masyarakatnya majmuk.

Katanya, undang-undang sudah ada dan pihak berkuasa perlu menguatkuasakannya dengan tindakan lebih tegas supaya menjadi pengajaran kepada individu lain serta isu itu tidak berlarutan.

"Semua pihak termasuk ketua komuniti, badan bukan kerajaan (NGO) dan ahli politik perlu peka dengan tidak membuat kenyataan berbaur hasutan sekali gus menyentuh isu sensitif perkauman dan agama yang menjejaskan perpaduan negara.

"Sesiapa saja termasuk pemimpin negara dan politik yang didapati membangkitkan isu itu perlu diambil tindakan lebih tegas tanpa mengira usia dan kedudukan mereka supaya ia dijadikan pengajaran," katanya.

Katanya, susulan itu selain hukuman sedia ada boleh juga disarankan 'hukuman' tambahan seperti khidmat kerja sosial di hospital, bahagian kecemasan, tanah perkuburan dan rumah kebajikan.

Menurutnya, kesedaran moral untuk perkauman mesti diterap dari awal pendidikan sekolah dan jika tidak ditangani akan menjadi barah dalam negara sekali gus merosakkan perpaduan dan rakyat berbilang kaum.

"Selain itu mereka juga boleh dihantar ke kem jati diri nasional dengan ada khidmat kaunselor. Ini bagi memupuk rasa cinta pada negara untuk menyedarkan mereka asas perpaduan itu adalah toleransi dan saling menghormati," katanya.

Aktivis masyarakat, Mohd Nor Izzat Mohd Johari berkata, masyarakat negara ini hidup dalam suasana harmoni pada 1990-an sebelum isu perkauman mula hangat sejak 2005 apabila ramai pihak termasuk ahli politik memainkan sentimen itu sehingga kini ia semakin parah hingga ada pihak yang bertanggungjawab sengaja membangkitkannya.

Justeru katanya, beliau berpandangan mana-mana pertubuhan yang memang memainkan sentimen perkauman perlu diharamkan dan dikenakan tindakan undang-undang termasuk individu yang membawa isu yang menyentuh perkauman serta sensitiviti.

"Mana-mana individu itu bukan saja boleh dikenakan 'hukuman' melakukan khidmat sosial tetapi perlu dihantar menyertai program jati diri seperti dulu kita ada (kem) Biro Tata Negara.

"Ini menanam sifat jati diri dan tanggungjawab serta cintakan negara sebagai rakyat dan sebagai pencegahan juga sekolah perlu memupuk kembali sifat itu dalam kalangan murid. Kita perlu mengembalikan sekolah sebagai tempat perpaduan selain memperkasakan sekolah sebagai satu aliran," katanya.

Katanya, jika perkara itu tidak ditangani segera sehingga membabitkan keselamatan dan keamanan negara, sudah tiba masa untuk diwujudkan satu hukuman seperti Akta Keselamatan Dalam Negeri (ISA) supaya keadaan tidak semakin berlarutan dan parah dalam masyarakat.